

Pertemuan 3 jam dengan Dr M

Pemuda dapat gambaran lebih jelas

Oleh NORDIN MOHAMAD



ENCIK ANWAR

KOTA BAHARU, Isnin — Pergerakan Pemuda UMNO Malaysia telah mendapat gambaran lebih jelas mengenai aspek-aspek penting dalam dasar dan sistem pentadbiran kerajaan di bawah pimpinan Datuk Seri Dr Mahathir Mohamad.

Ini adalah hasil pertemuan khas Exco pergerakan itu dengan Perdana Menteri yang juga Presiden UMNO Malaysia di kediamannya, di Kuala Lumpur, baru-baru ini. Ketua pergerakan itu merangkap Timbalan Menteri di Jabatan Perdana

Menteri, Encik Anwar Ibrahim, menguati Exco Pemuda dalam perjumpaan 'hati ke hati' selama kira-kira tiga jam itu.

Encik Anwar berkata, berbagai perkara penting telah dibincang dalam pertemuan itu, termasuk soal format kerajaan sekarang di bawah pimpinan Datuk Seri Dr Mahathir.

Tertarik hati

Encik Anwar ditemui di Lapangan Terbang Sultan Ismail Petra dekat sini hari ini, sebelum pulang ke Kuala Lumpur setelah melakukan lawatan dua hari ke negeri ini.

Sewaktu di sini, beliau telah me-

rasmikan Kursus Kepimpinan Pergerakan Pemuda UMNO Negeri Kelantan dan mengadakan perjumpaan dengan para pemimpin Pemuda UMNO Negeri.

Encik Anwar berkata, Pemuda UMNO tertarik hati dengan cara Datuk Seri Dr Mahathir mentadbirkan negara.

"Kita menekankan kepada anggota-anggota Pemuda supaya memberi perhatian kepada cara Datuk Seri Dr Mahathir mentadbirkan negara," ujarnya.

Dalam pertemuan itu juga, tambah Encik Anwar, mereka bertukar-tukar pendapat untuk kepentingan negara seluruhnya.

Beliau memberitahu lagi, perjumpaan yang sama juga akan diadakan dengan Timbalan Perdana Menteri, Datuk Musa Hitam, bulan depan, diikuti pertemuan dengan Menteri Kewangan, Tengku Razaleigh Hamzah dan beberapa orang pemimpin lain.

Berita Harian difahamkan, perjumpaan seumpama itu akan diadakan dari masa ke semasa sebagai sebahagian daripada rancangan dan usaha-usaha utama Pergerakan Pemuda UMNO Malaysia.

Bahan asal dari Arkib
Negera Malaysia